

OSLOBODENJE

Objavljeno:10.01.2018.

Potpisan ugovor: Počinje izgradnja trafostanice za VE Podveležje

Kablovskom i fiberoptičkom mrežom će se izvršiti energetska i telekomunikaciono povezivanje vjetroagregata sa trafostanicom, a s ciljem plasmana proizvedene električne energije iz VE Podveležje u 110 kV mrežu

JP Elektroprivreda BiH sa kompanijom ABB d.o.o Zagreb potpisala je ugovor za izgradnju trafostanice (110/30 kV) i kablovske (30 kV) i fiberoptičke mreže za Vjetroelektranu Podveležje.

Kablovskom i fiberoptičkom mrežom će se izvršiti energetska i telekomunikaciono povezivanje vjetroagregata sa trafostanicom, a s ciljem plasmana proizvedene električne energije iz VE Podveležje u 110 kV mrežu, te upravljanja vjetroparkom.

Ugovor se finansira iz kreditnih sredstava njemačke KfW banke, a ukupna vrijednost je 4.098.026 eura. U prvoj fazi realizacije ugovora obaveza izvođača je izrada izvedbenog projekta za trafostanicu Podveležje, kao i izrada glavnog projekta za kablovsku i fiberoptičku mrežu.

JP Elektroprivreda BiH je dobila građevinsku dozvolu za izgradnju trafostanice čime su se stekli uslovi za početak izvođenja pripremnih radova, saopćeno je iz Elektroprivrede BiH.

Predviđeni rok za realizaciju ugovora je 20 mjeseci. Potpisom ugovora učinjen je značajan napredak u realizaciji cjelokupnog projekta izgradnje VE Podveležje, čijom izradnjom će se povećati instalirani kapaciteti kao i udio proizvodnje električne energije iz obnovljivih izvora.

[Alema Pendek](#)

OSLOBODENJE

Objavljeno: 10. 01. 2018.

Piše: Eldar Dizdarević

Šta će biti sa cijenama struje?

Elektroprivreda Bosne i Hercegovine ne planira u ovoj godini povećanje cijena električne energije za domaćinstva. No, pitanje je hoće li to zaista tako i biti?

Krajem prošle godine održana je 48. vanredna Skupština dioničara Javnog preduzeća Elektroprivreda BiH (EPBiH) Sarajevo, na kojoj je, između ostalog, usvojen Plan poslovanja za period od 2018. do 2020. godine. Nešto ranije Uprava društva je utvrdila pomenuti plan, potom je saglasnost na njega dao Nadzorni odbor, a nakon što je i Skupština dala zeleno svjetlo, ovaj je dokument početkom godine postao operativan. Šta su ključni elementi trogodišnjeg plana poslovanja EPBiH? Kako je navedeno u dokumentu, planom se nastoji obezbijediti stabilnost u snabdijevanju kupaca električnom energijom te ostvarenje dobiti u sve tri godine, a na bazi planskih projekcija i pretpostavki. Zbog toga je planirao značajno zaduženje kod međunarodnih i domaćih finansijskih institucija i to od blizu 1,7 milijardi KM.

Nakon 2017, koju će EPBiH završiti sa gubitkom od 21,8 miliona KM (procjena Uprave), u ovoj je godini planirano 15,9 miliona KM dobiti. Naredne godine dobit EPBiH bi trebala iznositi 34,4 miliona KM, a 2020. oko 33,9 miliona KM. Pri tome će proizvodnja električne energije ostati otprilike na istom nivou (7.116 GWh u 2017, a potom, 7.342, 7.393 i 7.138 GWh u 2020.), baš kao i operativni prihodi, broj kupaca i broj zaposlenih. Interesantno, EPBiH planira smanjenje operativnih rashoda sa 990 miliona KM u prethodnoj na 804 miliona KM u 2020. godini i to pored svih planiranih investicija i zaduženja.

No, kada smo već kod zaduženja, pomenimo da je planom predviđeno da se većina sredstava od pomenutih 1,7 milijardi KM utroši na izgradnju bloka 7 termoelektrane Tuzla te vjetroparka Podveležje, malih hidroelektrana na rijeci Neretvici, kao i nastavak izgradnje hidroelektrane Vranduk koja je privremeno obustavljena tokom 2017. EPBiH planira također nastaviti i investiranje u rudnike, a sve će pomenuto, kako piše u dokumentu, dovesti do znatno većeg nivoa zaduženosti u odnosu na period izrade plana, s obzirom na to da većina potrebnih finansijskih sredstava mora biti obezbijedena iz eksternih izvora.

No, pravo pitanje za većinu građana u (F)BiH jeste hoće li sve pomenuto uticati na cijene električne energije za potrošače EPBiH? Odgovor na to pitanje nalazimo u Planu poslovanja. "Imajući u vidu socijalni aspekt, odlučeno je da se tarifni stavovi za kategoriju Domaćinstva neće mijenjati u odnosu na one koji su važili za 2017. (zadnji put promijenjeni početkom 2015. godine), dok će za pojedine kategorije i grupe kupaca na tržišnom snabdijevanju biti i nešto viši (s obzirom na proizvodnu cijenu EPBiH i rast cijena energije na regionalnom tržištu), a što će imati odraza na prosječnu prodajnu cijenu i prihod od prodaje krajnjim kupcima", piše u dokumentu.

Dakle, cijene električne energije za domaćinstva se ove godine ne bi trebale mijenjati u odnosu na cijene iz 2017. (prosjeak 14,48 feninga po kWh), dok će cijene za pojedine kategorije biti nešto više. Koje su to kategorije? FERK, odnosno Regulatorna komisija za

energiju u FBiH, nedavno nije dao saglasnost EPBiH za povećanje cijena električne energije za kupce iz kategorije Ostala potrošnja na 0,4 kV naponu, pa je za pretpostaviti da je riječ upravo o toj kategoriji. A to su svi mali poslovni potrošači, tipa pekara, kafića i slično. Njima Elektroprivreda BiH planira uvećati račune mjesečnih “čestitki” čim im FERK da saglasnost za to i to se odnosi samo na 2018. godinu.

Uprava EPBiH to ovako obrazlaže. Od 2015. svi krajnji (pa tako i kupci iz kategorija Domaćinstva i Ostala potrošnja na 0,4 kV naponu) stekli su pravo na slobodan izbor snabdjevača, što znači da sve kategorije krajnjih kupaca električne energije u BiH imaju mogućnost slobodnog izbora snabdjevača. Pored tri elektroprivrede u BiH, registrirane su još 23 kompanije koje imaju licencu snabdijevanja, ali je odziv kupaca spram novog zakonskog okvira, dakle, spram otvorenog tržišta, bio i više nego skroman, o čemu smo već u nekoliko navrata pisali u Oslobođenju. Uprava EPBiH navodi da ih je to dovelo “u jednu sasvim novu poziciju”, baš kao i ostale elektroprivrede, iako odmah dodaje da je zadržano preko 97,5 posto krajnjih kupaca ako se gleda obim krajnje potrošnje. Dodaje se, također, da je u zadnjih dvadesetak mjeseci došlo do evidentnijeg prelaska dijela krajnjih kupaca kod drugih snabdjevača, ali se većina njih u drugom polugodištu 2017. ponovo vratila pod okrilje EPBiH. I to prvenstveno zbog cijena. Zbog toga Uprava EPBiH procjenjuje da su za kategoriju Domaćinstva regulirane tarife i dalje relativno niske te da za tržišne snabdjevače ne ostavljaju prostora za formiranje nižih tarifa koje bi omogućile profit.

U osnovi, zaista je tako. Cijene električne energije u BiH su u poređenju sa cijenama u Evropi niske, pri čemu se, nažalost, paralelno s tim niko i ne osvrće niti poredi životni standard i kupovnu moć. Prema podacima Eurostata (Electricity Price Statistics, November 2017), na području Evrope niže cijene električne energije od cijena u BiH (domaćinstva 0,086 eura, nedomaćinstva 0,069 eura po kWh) imaju Makedonija (0,082 i 0,056) i Kosovo (0,066 i 0,080). Svi ostali imaju daleko više cijene, pri čemu je, naprimjer, prosjek cijena u EU 0,220 i 0,121 euro po kWh. U ovom slučaju vrijedi obratiti pažnju na slijedeće - na razlike prosječnih cijena za domaćinstva i nedomaćinstva, gdje spada ona kategorija Ostali potrošači. Prosječne cijene električne energije u EU su duplo niže za nedomaćinstva od cijena za domaćinstva (0,121 naspram 0,220 eura) i to je model kojeg međunarodna zajednica zdušno gura implementirati i u BiH.

Upravo zbog toga već godinama slušamo priče predstavnika međunarodne zajednice kako bh. kompanije na izvjestan način “subvencioniraju” cijene električne energije za domaćinstva, što, naravno, prema njima, treba hitno promijeniti. Ukoliko se ima na umu činjenica da su predstavnici međunarodne zajednice pravi i istinski kreatori ovdašnjeg makroekonomskog i zakonodavnog okruženja, ova se ideja nikako ne smije potcijeniti. Uostalom, historija nas tome uči. Recimo, kada su prije nešto više od desetak godina u BiH izgubljeni prihodi od ukidanja carina na uvezenu robu (otprilike oko milijardu KM godišnje), taj je manjak odmah prebačen preko novouvedenog poreza na dodanu vrijednost na leđa svih građana. Slično će se morati desiti i sa cijenama električne energije. Jer s pozicije predstavnika međunarodne zajednice ovo pitanje izgleda ovako: zašto bi neka strana kompanija u BiH morala plaćati skuplju cijenu struje kada se ta cijena lijepo može prebaciti na leđa svih građana? Zašto bi uvoznici u BiH plaćali carine kada se to može prebaciti na leđa građana?

Pomenuti Plan poslovanja Elektroprivrede BiH u naredne tri godine - bar što se tarifa tiče - u potpunosti je u suprotnosti sa pomenutim stavom predstavnika međunarodne zajednice. No, nažalost, to ujedno ne znači i da će tako biti. Koliko je god zadržavanje niskih cijena električne energije u interesu svih građana BiH, to jednostavno nije u interesu predstavnika

međunarodne zajednice. I zbog toga je, zapravo, pravo pitanje šta će u naredne tri godine zaista biti sa cijenama električne energije.

OSLOBODENJE

Objavljeno:15.02.2018.

EPBiH predlaže da cijena struje za domaćinstva ostane nepromijenjena

Za kupce iz kategorije Ostala potrošnja na 0,4 kV s priključnom snagom većom od 23 kW predloženo je povećanje ukupne prosječne cijene 3,6 posto

Ukoliko FERK da saglasnost na predložene cijene one će se primjenjivati od 1. aprila

Regulatorna komisija za energiju u Federaciji BiH - FERK na sjednici u četvrtak u Mostaru usvojila je tekst obavijesti za javnost o podnesenom prijedlogu cijene usluge JP Elektroprivreda BiH d.d. Sarajevo FERK-u na saglasnost.

Prijedlog JP Elektroprivreda BiH d.d. Sarajevo je da se cijene za kategoriju kućanstva ne mijenjaju, dok je za kupce iz kategorije Ostala potrošnja na 0,4 kV s priključnom snagom većom od 23 kW predloženo povećanje ukupne prosječne cijene 3,6 posto.

Za kupce s priključnom snagom manjom od 23 kW koji posjeduju dvotarifno brojilo predloženo je smanjenje ukupne cijene za 0,7 posto, odnosno, 0,6 posto za kupce koji posjeduju jednotarifno brojilo, saopćeno je iz FERK-a.

Ukoliko FERK da saglasnost na predloženu cijenu usluge, one će se primjenjivati od 1. 4. 2018. godine.

Dostavljeni prijedlog analizirat će se kako bi se utvrdilo je li u skladu s Metodologijom za utvrđivanje cijena usluge javnog opskrbljivača za pružanje univerzalne usluge u Federaciji BiH i jesu li se stekli uvjeti za davanje saglasnosti FERK-a. O daljnjim aktivnostima FERK-a javnost će biti pravodobno obaviještena.

[Alema Pendek](#)

OSLOBODENJE

Objavljeno: 23. Mart 2018.

Ljetno računanje vremena mijenja satnicu jeftine i skupe struje

Za domaćinstva koja posjeduju dvotarifna brojila, manji dnevni tarifni stavovi (tzv. jeftinija električna energija) primjenjivat će se radnim danima i subotom u periodima od 14 do 17 i od 23 do 8 sati, a nedjeljom cijeli dan

Promjena u primjeni jeftinije i skuplje električne energije

U nedjelju, 25. marta, počinje ljetno računanje vremena. U 2 sata ujutro kazaljke je potrebno pomjeriti za 60 minuta unaprijed na 3 sata. Ovo dovodi i do promjena u primjeni jeftinije i skuplje električne energije.

Kako je saopćeno iz JP Elektroprivreda BiH za domaćinstva koja posjeduju dvotarifna brojila, manji dnevni tarifni stavovi (tzv. jeftinija električna energija) primjenjivat će se radnim danima i subotom u periodima od 14 do 17 i od 23 do 8 sati, a nedjeljom cijeli dan.

- Za sve ostale kupce JP Elektroprivreda BiH, manji dnevni tarifni stavovi primjenjivat će se radnim danima u periodima od 23 do 8 sati, a subotom i nedjeljom cijeli dan, saopćeno je JP EP BiH.

[Alema Pendek](#)

OSLOBODENJE

Objavljeno: 02.04.2018.

Elektroprivreda BiH razočarala rudare

Sa ponuđenom otkupnom cijenom za ugalj koji dajemo TE Kakanj od 60 KM po toni, koliko košta i tona kamena, išli bismo u negativno poslovanje, tvrdi Zaimović

Ponuđena cijena za ugalj koji se daje TE Kakanj je najniža u posljednjih 40 godina

Nakon što je Elektroprivreda BiH odbila povećati otkupnu cijenu uglja Rudniku Breza za ćumur koji dostavljaju u Termoelektranu Kakanj, u brezanskom ugljenokopu ne kriju ogorčenje. Uz najavu odmrzavanja štrajka rudara iz Sindikata moguće je i donošenje odluke da se obustavi dalja isporuka TE Kakanj, a da ugalj deponuju do daljnjeg u krug rudnika.

Tržišno poslovanje

- Sa 60 KM po toni koliko bi oni da nas plaćaju, ne bismo mogli isplaćivati plate radnicima i obaveze za njihove plate. Rudnik Breza neće više da radi na način da ne izmiruje obaveze na platu, da se to gomila. Želimo raditi tržišno, da radimo pozitivno, da živimo od svog rada i zarade. Bolje je i ugastiti se nego da budemo socijalni slučaj u okolnostima gdje to sigurno nismo. A ponavljam, imali smo najveću proizvodnju u 110-godišnjoj istoriji ugljenokopa i to sa duplo manje radnika nego u ona zlatna vremena Alije Sirotanovića, kazao je Čamil Zaimović, generalni direktor Rudnika Breza.

Zaimović je objasnio da je Rudnik Breza u podređenom položaju u odnosu na ostale rudnike u sastavu Koncerna. Tražili su, veli, zbog toga i prošle i ove godine da se izjednače sa ostalim rudnicima.

- Dajemo puno kvalitetniji ugalj od ostalih i tražili smo da nam barem plaćaju jednako kao ostale. S obzirom na to da je prošle godine bio ugrožen elektroenergetski sistem zbog suša i problema koje su imali sa hidropotencijalom, mi smo prihvatili da radimo više i "povukli" proizvodnju. Čak 87 posto je struje proizvedeno u termoelektranama Kakanj i Tuzla zahvaljujući rudnicima i njihovom uglju, a 13 posto je proizvedeno struje iz hidroelektrana, rekao je Zaimović.

On je dodao da je otkupna cijena uglja po toni 60 KM, koliko košta i kamen na tržištu. Sa tom cijenom bi, gotovo sigurno, išli u negativno poslovanje.

Prošle godine RMU Breza je proizveo 670.000 tona komercijalnog uglja sa 1.200 radnika. Prema riječima prvog čovjeka brezanskog rudnika, u prvom polugodištu 2018. očekuje se slična proizvodnja kao u istom periodu prošle godine, dok bi u drugom polugodištu moglo doći do pada proizvodnje "s obzirom na to da Elektroprivreda nije ispunila obaveze prema Rudniku, a to je nabavka adekvatne opreme za koju su odavno obezbijedena sredstva".

Obaranje tendera

- Izgleda da se namjerno obaraju tenderi od EPBiH, da su neki ljudi tamo, izgleda, već krenuli u predizbornu kampanju i obaraju tendere, dajući nerealan budžet i ne nabavljaju adekvatnu opremu za Rudnik Breza. A sada su odbili da nas plaćaju po cijeni koju je država odredila - pet maraka po gigadžulu i da nam spuste granični prag kao za ostale rudnike. Apsurdno je to da nama sa 10.500 GJ po kg ne primaju ugalj, odnosno prime ga pa ga spale i ne plate ništa, a 8.000 GJ po kg kupuju od Miljevine i Stanara kod Doboja koji nisu dio Koncerna, koji su iz drugog entiteta i plaćaju po istoj cijeni kao što plaćaju nama za daleko kvalitetniji ugalj. Isto tako, niži prag kvaliteta uglja ima Kakanj pa primaju ugalj, a nas pljačkaju. To se sve dešava zajedno sa kućom koja radi za Elektroprivredu. Posebno apsurdno je da kupac određuje i cijenu i kvalitet uglja. Istina je da je ovaj menadžment EPBiH popravio stanje u rudnicima u odnosu na bivšu upravu, ali ovo nisu smjeli sebi da dopuste. Nisu smjeli da dopuste da politika uđe u sve pore preduzeća, naglasio je Zaimović.

[Mirza Dajić](#)

OSLOBODENJE

Objavljeno: 26. Juni 2018.

Doći ćemo u nezavidnu situaciju da nećemo gdje imati kopati ugalj i ako budemo imali opremu, rekao je Čamil Zaimović, direktor RMU Breza

Rudnici u Federaciji BiH neće moći dugo raditi na ovaj način

Doći ćemo u nezavidnu situaciju da nećemo gdje imati kopati ugalj i ako budemo imali opremu, rekao je Čamil Zaimović, direktor RMU Breza

Čelni ljudi RMU Breza razgovarali su sa direktorom RMU Zenica o načinu isplate dugovanja ovog rudnika prema Brezi. Radi se o milion KM plus kamate.

Rudnik Breza, iako je u prvih šest mjeseci ove godine ostvario 15 posto veću realizaciju od planirane proizvodnje, najvjerojatnije neće poslovati pozitivno ili će u najboljem slučaju biti na samoj granici pozitivnog poslovanja. Razlog tome je, tvrdi direktor ovog ugljenokopa Čamil Zaimović, što su troškovi u velikom porastu u odnosu na prethodne godine, a cijena uglja je pala.

Otkupna cijena uglja

- Cijena uglja koji dostavljamo Termoelektrani Kakanj je najniža u posljednjim godinama, možda čak najniža u dugoj istoriji rudnika gledajući na ostale repromaterijale kao što su lučna podgrada, drvo, ulja, maziva, upaljači i eksploziv. Mislim da ovo neće moći izdržati nijedan rudnik. Imamo najbolju proizvodnju u istoriji rudnika sa najmanjim troškovima, sa duplo manjim brojem radnika, ali ne možemo finansijski zatvoriti poslovanje. Na mjesečnom i polugodišnjem nivou jedva, ali na kraju godine sigurno nećemo stići jer imamo planirane radove. Gubimo korak, nećemo uspjeti plaćati obaveze prema radnicima i doći ćemo u situaciju u kojoj smo bili prije nepunu godinu kad su ljudi prijetili štrajkovima i najavljivali odlazak pred zgradu Elektroprivrede BiH, kazao je Čamil Zaimović.

On je objasnio da je zahvaljujući rudnicima u Koncernu spašen elektroenergetski sistem gdje su termoelektrane zahvaljujući uglju od rudnika, dale više od 80 posto energetskog potencijala. Hidropotencijali su, veli, zakazali, s obzirom na to da nije bilo dovoljno vode. Objasnio je da rudnici nisu zadovoljni zbog svega pobrojanog odnosom Koncerna prema njima.

- Nikakvu subvenciju prošle godine nismo dobili da bismo oživili te kapacitete jer smo i mi bili mobilisani i kapacitete smo bez neke dublje pripreme za naredni period raubali. Pretpostavljam da su isto radili i drugi rudnici. Mislim da ćemo doći u nezavidnu situaciju da nećemo gdje imati kopati ugalj i ako budemo imali opremu, rekao je Zaimović.

Čelni čovjek RMU Breza je dodao da i dalje stoji primjedba da se vrlo sporo, teško i tromo nabavlja oprema preko Elektroprivrede, da se godinama čeka da se realizuje kompleks nove podgrade i novog čela i da nisu zadovoljni “pojednim ljudima EPBiH koji trebaju da rade u operativi”.

- Jedno isto se nabavlja dvije godine i za te dvije godine mi izgubimo oko pet miliona maraka. A kod evaluacije se govori da se uštedjelo 50-ak hiljada maraka. Da li se isplati uštedjeti 50.000 KM, dvije godine komisije da rade, dva-tri puta obnavljaju evaluacioni proces, a mi izgubimo oko pet miliona KM? Da ne govorimo o mehanizovanom kompleksu za koji stoje pare i propadaju, cijena željeza na svjetskom tržištu raste, a mi smo izgubili za ove dvije godine otkako se obaraju ti tenderi i ponavljaju, navodno zbog Zakona o javnoj nabavci, 500.000 tona uglja koje bi taj kompleks donio. Niko ne vodi računa o tome. Dovedeni smo u situaciju da pripremni kapaciteti u jami stoje, propadaju, hodnici zarastaju, zaplinjuju se, bujaju prostorije u kojima mi kasnije, kad uvedemo novu opremu, nećemo moći normalno raditi, kazao je Zaimović.

On je poručio da nisu zadovoljni zbog pojedinih ljudi iz Elektroprivrede, ali i da je ova uprava EPBiH napravila najveći napredak u odnosu na prethodne uprave Koncerna. RMU Breza je podnio i krivične prijave protiv nekih ljudi, ali to “stoji po tužilaštvima, a samo se procesuiraju sitne stvari po rudnicima”.

Oprema se teško nabavlja

- Svaki dan se od rudnika traži da smanjimo broj radnika, umjesto da se traži da zaposlimo nove radnike u proizvodnji i donosimo nove tone uglja. Za to vrijeme u našem vladajućem društvu JP EPBiH se za propale kadrove otvaraju direktorska radna mjesta. Ljudi iz stare uprave koji su zaslužni za ovakvo stanje su dobili uhljebljenje. Imaju dobre plate, a rudara smo spustili na 1.000 KM platu. To nije korektno. Mislim da se na rudarskim leđima dugo neće moći klatiti, naglasio je Zaimović.

Ekipe Oslobođenja zatekla je u zgradi uprave Rudnika Breza i čelnog čovjeka zeničkog ugljenokopa, direktora Nisveta Vrškića, koji je razgovarao sa ljudima iz uprave brezanskog rudnika o načinu isplate dugovanja koje imaju prema Brezi. Radi se o starom dugovanju, koje je po sudskoj presudi Zenica dužna platiti u iznosu od milion KM plus pripadajuće kamate.

- Razgovarali smo o pitanju potraživanja Rudnika Breza od Rudnika Zenica. Radi se o sudskom izvršenju. Ovo je trebalo davno biti riješeno. Trebali su to zajednički riješiti resorni federalni i kantonalni ministar skupa sa vladajućim društvom. Sudsko izvršenje se pominje od 2012. godine. Vlasti se mijenjaju, a ne rješava se onaj krucijalni problem. Osim Zenice, i Rudnik Kakanj duguje RMU Breza 300-400 hiljada maraka. Mi samo tražimo da se ta sredstva uplate da ih prosljedimo za penziono i zdravstveno osiguranje i poreze za zaposlene, istakao je Zaimović.

1.200 zaposlenih

Prema riječima Seada Šabića, izvršnog direktora za ekonomske i pravne poslove, RMU Breza trenutno ima 1.210 zaposlenih. Na tom nivou zaposlenih su duži niz godina. Prosječna plata je nešto iznad 1.000 KM.

Prošlogodišnja proizvodnja u RMU Breza, kada je iskopano 670.000 tona, bila je jedna od najvećih u 111 godina dugoj istoriji brezanskog ugljenokopa. U prvih šest mjeseci 2018. imali su proizvodnju od 320.000 tona, a plan za ovu godinu je 600.000 tona. To znači da su imali prebačaj u prvoj polovici 2018. od 15-ak posto.

- Ide nam nepovoljan period, slijedi nam još jedno preseljenje, tako da sama proizvodnja neće dostići nivo prošlogodišnje. Prošle godine nije bilo preseljenja, imali smo čelo u kontinuitetu, tako da smo dostigli tu rekordnu proizvodnju. Proizvodnja u Rudniku Breza je organizovana sa jednim mehanizovanim čelom. I dalje se radi sa dvije jame. U drugoj jami se radi komorno-stubnim otkopom, što je poprilično nesigurna metoda, sa malim učincima, pojasnio je proces rada Amir Kulagić, izvršni direktor za tehničke poslove RMU Breza.

[Mirza Dajić](#)

OSLOBODENJE

Objavljeno 4. Juli 2018.

Piše: [Eldar Dizdarević](#)

Rasterećenje privrede à la Vlada FBiH

U trenutku kada je EPBiH počeo tražiti garancije za kredit, obaveza po osnovu premije iznosila je oko 6 miliona KM. Sa izmjenom Pravilnika ta se obaveza povećala na 39,6 miliona KM!

Cijeli mandat Vlade Federacije BiH bit će potrošen na rasterećenje privrede. Ovu sada već legendarnu, vizionarsku rečenicu izgovorio je u martu 2015. godine aktuelni premijer federalne Vlade Fadil Novalić podnoseći svoj ekspoze. Međutim, nažalost, danas je svima jasno da je Vlada FBiH u posljednje tri godine dobar dio svog mandata potrošila na usvajanje mjera koje samo vode ka punjenju budžeta, pri čemu se te mjere čak i uz upotrebu dosta mašte ne mogu nazvati rasterećenjem bilo čega.

Evo najnovijeg primjera. Zapravo samo još jednog u beskonačnom nizu. Pogledajmo kako to federalna Vlada zaista “rasterećuje” privredu, odnosno na šta troši svoj mandat kako je to premijer najavio u ekspozeu. Nažalost, u javnosti se često i ne primjećuju ovakve i slične stvari jer je pažnja javnosti usmjerena većinom na zakone, tako da ovakva i slična “rasterećenja” često ne dobiju zasluženu medijsku pažnju. No, to ujedno i ne znači da je Vlada prestala trošiti svoj mandat na “rasterećenje” privrede.

Prije mjesec Vlada FBiH donijela je izmjene Pravilnika o pratećoj dokumentaciji i informacijama neophodnim u proceduri donošenja odluke o izdavanju garancije Federacije BiH i procentu premije i provizije za izdavanje garancije, koje su objavljene u Službenim novinama FBiH od 8. 6. 2018. Te izmjene sadrže samo četiri člana, a nas u ovom slučaju interesira član 3, koji kaže da se u članu 7 prethodnog istoimenog pravilnika broj 0,5 posto zamjenjuje brojem 3,3 posto. Na prvi pogled beznačajna sitnica, zar ne?

No, pogledajmo sada kakve efekte ta sitnica ostavlja u praktičnoj primjeni i provedimo je onda kroz prizmu “rasterećenja privrede”. Prvo skrenimo pažnju da je u ovom slučaju riječ o premiji i proviziji na garancije koje izdaje Federacija BiH, a koje obračunava i naplaćuje Ministarstvo finansija FBiH. U prethodnom pravilniku u članu 7 je navedeno da se premija naplaćuje jednokratno u trenutku izdavanja garancije, a obračunava se po stopi od 0,5 posto na iznos glavnice. Izmjenama pravilnika sada se premija obračunava po stopi 3,3 posto, što, naravno, predstavlja ogromno povećanje! Koliko je zapravo to veliko povećanje, vidi se tek kada se u cijeli ovaj slučaj uvedu konkretne brojke, iskazane u KM-ovima.

Evo sada i konkretnog primjera. Javno preduzeće Elektroprivreda BiH Sarajevo prije izvjesnog vremena započelo je proces traženja garancija Federacije BiH po osnovu kredita kod kineske banke Export-Import Bank of China (EXIM) za izgradnju bloka 7 u termoelektrani Tuzla. Riječ je o kreditu u iznosu od 614 miliona eura, a jedan od uslova za

odobrenje kredita koje traži kineska banka je garancija FBiH. U trenutku kada je Elektroprivreda počela tražiti garancije njena obaveza po osnovu premije iznosila je oko 6 miliona KM.

Međutim, sa pomenutom izmjenom Pravilnika ta se obaveza Elektroprivrede BiH preko noći povećala, kako saznajemo od dobro obaviještenih izvora, na 39,6 miliona KM! Kada se svemu tome još doda i provizija od 8 miliona KM, onda zapravo ispadne da u ovom procesu “rasterećenja privrede” Elektroprivreda BiH treba jednokratno prije izdavanja garancije Ministarstvu finansija FBiH, odnosno federalnoj Vladi, platiti ravno 47,6 miliona KM! Nema šta, rasterećenje privrede à la federalna Vlada par excellence!

Na našu veliku žalost, nisu predstavnici aktuelne federalne izvršne vlasti samo na ovo “rasterećenje” potrošili nešto više od tri godine svog mandata. Smanjili su tako oni, naprimjer, zateznu kamatu na radnička potraživanja sa 12 na samo 0,2 posto. Smanjili su prvo i neoporezivi dio toplog obroka, kao i neoporezivi dio regresa, da bi se na kraju, najnovijim izmjenama zakona, u potpunosti došlo do glave toplom obroku, naknadi za prevoz i regresu. Zbog toga iz Saveza samostalnih sindikata BiH tvrde da će nedavno donesenim zakonima o doprinosima i porezu na dohodak de facto doći do ukidanja toplog obroka, naknada za prijevoz i regres, čime će se izvršiti dodatni udar na džepove radnika.

S druge strane, poslodavci u FBiH, dakle upravo oni zbog kojih bi se najvećim dijelom i trebale provoditi mjere rasterećenja privrede, kažu da su sve dosadašnje aktivnosti aktuelne Vlade FBiH, a posebno posljednje zakonske izmjene doprinosa i poreza na dohodak, više kozmetičke nego reformske prirode čiji je jedini cilj zapravo povećanje budžetskih prihoda. Da li su poslodavci u pravu ili ne, odgovor će nam ponuditi i čisto retoričko pitanje koja je stvarna svrha, naprimjer, enormnog povećanja premije i provizije na izdavanje garancija FBiH. Trebamo li se sada uopće prisjećati Zakona o radu u FBiH koji je kroz parlamentarnu proceduru proguran uz svesrdnu pomoć predstavnika međunarodne zajednice u BiH, Svjetske banke i MMF-a, a uz ogromno protivljenje nezavisnih stručnjaka, radnika i Sindikata, kao i ostalih reformskih mjera aktuelne Vlade FBiH?

Uostalom, možda je najbolji i najprecizniji opis dosadašnjeg pregalaštva federalne Vlade na rasterećenju bh. privrede dao zastupnik u Zastupničkom domu Parlamenta FBiH prof. dr. Dženan Đonlagić, ekonomista i univerzitetski profesor. On je nedavno rekao kako ključne ekonomske mjere rasterećenja privrede nisu ispunjene, a dokaz tome u prilog su i novi zakoni o doprinosima i porezu na dohodak. I premijer Novalić i ministrica finansija Jelka Milićević koriste u svojim izlaganjima termin “neutralni fiskalni efekat”, kaže on. A konstatacijom da zakoni i reformske mjere dovode do neutralnog fiskalnog efekta dokaz su da ne dolazi do rasterećenja privrede, već da se samo na drugačiji način vrši raspodjela javnih prihoda.

I upravo je u tome suština svega. Dok predstavnici Vlade FBiH nesebično troše svoj cijeli mandat na navodno rasterećenje privrede, oni zapravo u veoma bliskoj saradnji sa predstavnicima Svjetske banke i MMF-a predano rade samo na punjenju budžeta radi što sigurnije otplate kredita čiji je cilj u konačnici samo finansiranje preglomazne i jalove administracije. Pri tome je i federalnoj Vladi, ali i predstavnicima Svjetske banke i MMF-a, privreda doslovno zadnja rupa na svirali. Upravo to potvrđuju i mali primjeri iz prakse poput gore opisanog slučaja povećanja premije i provizije za izdavanje garancija Federacije BiH.

OSLOBODENJE

Objavljeno 1. Avgust 2018.

Piše: [Eldar Dizdarević](#)

Izbori zaledili cijene struje

U BiH trenutno postoje i rade - ili se pak grade ili imaju dozvolu za gradnju - čak 52 energetska objekta - 31 mala i velika hidroelektrana, 14 rudnika i termoelektrana, šest vjetroelektrana, te jedna gasna

Energetika je jedan od najvažnijih ekonomskih sektora u BiH i to prevashodno proizvodnja električne energije. Tome u prilog svjedoči činjenica da se, između ostalog, sve makroekonomske projekcije BiH temelje na predviđanjima vezanim za izvoz i trgovinu električne energije, što laički rečeno znači da će bh. izvoz rasti ukoliko bude rastao izvoz električne energije. Osim toga, pomenutoj konstataciji u prilog svjedoči i činjenica da u BiH trenutno postoje i rade - ili se pak grade ili imaju dozvolu za gradnju - čak 52 energetska objekta. Od tog se broja 31 objekt odnosi na male i velike hidroelektrane, 14 objekata na rudnike i termoelektrane, šest objekata na vjetroelektrane, te jedan objekt koji se svrstava u takozvane gasne elektrane. I taj se broj doslovno iz dana u dan uvećava.

Nažalost, sve je to bazirano ne na osmišljenom razvoju energetskog sektora BiH, nego prije svega na tome da BiH gotovo i nema nikakve industrijske proizvodnje pa zbog toga ima viškove električne energije koje može prodavati i izvoziti. Pored toga, a možda i još važnije je sumanuto i neplansko izdavanje dozvola investitorima za gradnju novih energetskih postrojenja, pri čemu ekologija ima ulogu zadnje rupe na svirali. Zbog toga smo na izvjestan način već odavno postali “proizvodna crna rupa” regije, gdje se slikovito rečeno proizvodi jeftina električna energija odakle se struja žicom vodi ka vani i prodaje, dok se građanima u amanet ostavlja izuzetno opasno onečišćenje zraka.

Nije naodmet opet ponoviti. Prema podacima Hidrometeorološkog zavoda FBiH u Sarajevu je u januaru 2016. koncentracija opasnih čestica u zraku dostigla rekordnih 700 mikrograma po kubnom metru, dok je granična vrijednost te koncentracije u svijetu 50 mikrograma. U zemljama EU kao granična vrijednost postavlja se u posljednje vrijeme 25 mikrograma. U Pekingu u januaru 2016, čije su apokaliptične slike zagađenog zraka tada obilazile planetu, koncentracija opasnih čestica u zraku iznosila je 156 mikrograma po kubnom metru!

Pogledajmo sada kako su poslovale kompanije koje su na izvjestan način lideri u ovom segmentu. Riječ je, naravno, o Elektroprivredi BiH Sarajevo, te Elektroprivredi HZHB Mostar i njihovim poslovnim rezultatima za 2017, s tim da smo zapravo prinuđeni izostaviti podatke o poslovanju Elektroprivrede RS Trebinje iz ovog pregleda. I to ne zbog političkih razloga,

već naprosto zbog činjenice da je ovaj mješoviti holding zapravo veoma čudnom organizacijom postao kompanija-ljuštura, jer su iz njenog sastava izdvojeni svi proizvodni i distributivni dijelovi radi što lakše i jeftinije prodaje proizvodnih dijelova (dvije termoelektrane i tri hidrocentrale) i to prema ideji i planu predstavnika međunarodne zajednice u BiH. Elektroprivreda RS-a je zadržala većinske udjele u njima, ali... Ista je sudbina bila namijenjena i federalnim elektroprivredama, no zbog raznih ličnih interesa pojedinaca iz lokalne politike, kao i beskrajnog natezanja po parlamentarnim kuloarima, takav organizacioni ustroj nije, na sreću, nametnut i u većem bh. entitetu.

Najveća bh. kompanija, dakle Elektroprivreda BiH Sarajevo, prošlu je godinu završila sa 412 hiljada KM ukupne sveobuhvatne neto dobiti, što je značajan pad naspram 2016. kada je dobit iznosila 9,4 miliona KM. No, dobra stvar je to što prihodi kompanije zapravo rastu, sa 997 miliona KM na 1,11 milijardi KM, od čega je većina prihoda (1,09 milijardi KM) ostvarena na domaćem tržištu.

Naravno, to nas odmah vodi i do ideje koja je tokom ove godine sasvim sigurno padala mnogo puta na pamet svim čelnim ljudima elektroenergetskih javnih preduzeća - a to je povećanje cijena električne energije kako bi se dobit kompanije zadržala na prethodnim nivoima. Na sreću većine građana BiH, ovo je izborna godina, pa je ta sitna činjenica sigurno bar malo omela menadžment u njegovoj "plemenitoj nakani" da poveća dobit elektroprivrednih kompanija.

Paralelno sa rastom prihoda, povećani su i rashodi kompanije, sa 989 miliona na 1,13 milijardi KM, gdje su tokom 2017. znatno smanjeni troškovi amortizacije i rezervisanja. U ovoj kompaniji na kraju 2017. bilo je uposleno ukupno 4.529 osoba, dok je 2.536 dioničara kontrolisalo 31.506.541 dionicu, nominalne vrijednosti 71 KM po dionici. Od toga većinu dionica, čak 90 posto, kontrolira Vlada FBiH, zahvaljujući kojoj je i uticaj predstavnika međunarodne zajednice u ovom javnom preduzeću, poput MMF-a, Svjetske banke i drugih, itekako značajan, iako ih zapravo nigdje nema u papirima.

Nasuprot veće federalne sestre je Elektroprivreda HZHB Mostar, čijih 1.525 dioničara kontrolira 7.361.660 dionica, nominalne vrijednosti 100 KM po dionici. Vlada FBiH i njeni prateći sateliti iz zemlje i inostranstva kontroliraju i u ovoj kompaniji 90 posto emitovanih dionica. Elektroprivreda HZHB je tokom prošle godine registrirala pad prihoda sa 379 miliona KM iz 2016. na 292 miliona KM tokom 2017, što se, naravno, odrazilo i na dobit. Tako je mostarska sestra prošlu godinu završila sa 237 hiljada KM ukupne sveobuhvatne neto dobiti, naspram 2,3 miliona KM profita iz 2016.

Rashodi su također smanjeni, ali za razliku od Elektroprivrede BiH, u ovom javnom preduzeću plate 2.142 uposlena nisu dirane. Naprotiv, povećane su za tri miliona KM ukupno, sa 86,6 miliona KM iz 2016. na 89,6 miliona KM tokom 2017. U smislu racionalizacije poslovanja zbog pada prihoda, najviše su "zaplatili" troškovi proizvodnih usluga, koji su smanjeni sa 51 na 33 miliona KM. Sudeći prema izvještajima iz medija, i menadžmentu ovog javnog preduzeća padale su tokom godine na pamet ideje o povećanju cijena električne energije, ali se i tu ispostavila izgleda nepremostiva prepreka zvana opći izbori.

Za kraj pomenimo i da je Elektroprivreda RS Trebinje prošlu godinu završila sa 422 hiljade KM ukupne sveobuhvatne neto dobiti, ali je pravo pitanje koliko je taj rezultat zaista i realan s obzirom na ustroj i organizaciju ovog mješovitog holdinga, čak uprkos činjenici da su prihodi trebinjske firme lani iznosili 386 miliona KM.

Svemu tome dodajmo još i to da su zapravo najveći izvoznici električne energije iz BiH kompanije u privatnom vlasništvu, a ne javna preduzeća. EFT RiTE Stanari, Alpiq Energija BH Sarajevo i EFT Bileća izvezli su lani čak 71 posto ukupnog iznosa izvezene električne energije.

I na kraju zaključimo. Elektroenergetski sektor jeste važan i možda najznačajniji dio bh. ekonomije, ali to nije proizvod osmišljenog razvoja tog sektora, nego prije svega slabosti bh. industrije i gotovo nekontroliranog, politički kontroliranog izdavanja dozvola za izgradnju novih postrojenja. Nažalost, ekologija je u svemu tome odavno stradala, jer je već ustoličeno nepisano pravilo da se struja žicom izvozi iz BiH, dok prljavi nusproizvodi njene proizvodnje ostaju tu. Javna preduzeća imaju i dalje najveći tržišni udio na lokalnom tržištu, ali ona posluju u skladu sa dnevnopolitičkim dešavanjima, čemu u prilog svjedoče i finansijski izvještaji o poslovanju. Ta javna preduzeća inače mogu mirno da čekaju neka “bolja vremena” kada će biti raskomadana na distributivne i proizvodne dijelove koji će potom preći u ruke stranaca za smiješno male pare, a sve u skladu sa dugoročnim projekcijama i strategijama planiranog razvoja ovog sektora.



Objavljeno:19.09.2018.

Još nema zvaničnog saopćenja

Potvrđeno iz EPBiH: Kineski investitori se ne povlače iz projekta izgradnje Bloka 7

Cijeli projekt stoji zbog toga što još nije sazvan Parlament FBiH

Nakon jutrošnjih napisa na domaćim portalima da je kineski investitor odustao od finansiranja izgradnje Bloka 7 u Termoelektrani Tuzla, kontaktirali smo nadležne osobe iz "Elektroprivrede" koji su nam potvrdili da kineski investitori ipak nisu odustali od finansiranja ovog projekta.

Kako nam je u telefonskom razgovoru potvrdio izvršni direktor Elektroprivrede za investicije Senad Salkić, na adresu EPBiH nije stiglo zvanično saopćenje od kineskog investitora o prestanku saradnje.

- Mi još nismo dobili nikakvo zvanično saopćenje od naših kineskih partnera. Za sljedeću sedmicu najavljen je sastanak sa konzorcijalnim partnerima, gdje ćemo utvrditi daljnje korake. Sve je stalo zbog toga što Parlament nije usvojio dokumente koje smo im dostavili - rekao je Salkić.

Cijelu priču u vezi s izgradnjom Bloka 7 u TE Tuzla pročitajte u sutrašnjem izdanju "Dnevnog avaza".

Objavljeno:21.09.2018.

SKANDAL Povlače li se Kinezi iz projekta gradnje Bloka 7 TE Tuzla

Mušić i SDA ugrozili najveću poslijeratnu investiciju u BiH!?

Svi su uradili svoj dio posla, čeka se da Mušić zakaže sjednicu Predstavničkog doma Parlamenta FBiH

Potpisivanje ugovora i početak gradnje Bloka 7 Termoelektrane Tuzla trenutno ovise o jednom čovjeku - predsjedavajućem Predstavničkog doma Parlamenta FBiH Edinu Mušiću (SDA), koji svojim neradom dovodi u pitanje realizaciju projekta.

Istječe vrijeme

Mušić je, naime, odgovoran za zakazivanje sjednica ovog doma koji, nakon što su Vlada FBiH, Dom naroda i „Elektroprivreda BiH“ (EPBiH) uradili svoj dio posla, treba dati potrebne saglasnosti za kreditno zaduženje EPBiH i izbor kineskog konzorcija kao partnera za zajedničko ulaganje. Čim se to desi, mogu u roku od deset dana biti potpisani ugovori.

No, vremena je sve manje, a uprkos tome, na Mušića će se, izgleda, još čekati uprkos velikom broju urgencija. Nekoliko izvora iz Parlamenta kazalo nam je da nema šanse da sjednica bude u ovom mjesecu. Neki čak govore da se boji zakazati je zbog boraca.

Ovim Mušić u najmanju ruku odgađa cijeli projekt Bloka 7, koji je najveća poslijeratna investicija u BiH, teška oko 1,4 milijarde KM, te se postavlja pitanje čiji je to interes.

U nekim medijima objavljeno je da se kineski investitori povlače iz projekta nakon septembra. Bh. zastupnici konzorcija kineskih firmi nezvanično su i za „Avaz“ potvrdili da će se konzorcij povući ako do kraja septembra ne bude sjednice.

S druge strane, „Elektroprivreda BiH“ nema nikakvu informaciju, dok ministar energije, rudarstva i industrije FBiH Nermin Džindić ističe da nije tačno da je kineski konzorcij donio takvu odluku.

Oktobarski rokovi

- Ako kineski partner donese odluku, obavijestit će se prvo „Elektroprivreda BiH“, a ne mediji. Ali, slažem se da projekt zavisi od jednog čovjeka. Normalno je da se želi što prije krenuti s izgradnjom, jer se dugo na to čeka – naglasio je Džindić i dodao da su Ministarstvo i Ured premijera FBiH poslali „kamaru“ urgencija Predstavničkom domu.

Senad Salkić, izvršni direktor EPBiH za investicije, kazao je da su sve dozvole i rokovi za gradnju, koji su usaglašeni s investitorima iz Kine, vezani uz oktobar.

- Do 17. oktobra važe ugovori s Agencijom za osiguranje kredita u Kini, ali to ne znači da se ne mogu produžiti. Iduće sedmice vidjet ćemo s partnerima šta ova informacija iz medija znači, da li je tačna. Mi nismo dobili ništa što bi slutilo na ovakvo nešto – dodao je Salkić.

Značaj investicije

Mirza Kušljagić, profesor na Elektrotehničkom fakultetu u Tuzli, kaže da su trenutna postrojenja u TE Tuzla dotrajala te bi novi blok donio stabilnost u energetske sektoru.

Izet Žigić, predsjednik NO „Elektroprivrede BiH“, naglasio je da bi gradnja ovakvog jednog bloka predstavljala zadržavanje liderske pozicije u proizvodnji električne energije te opsluživanja privrede električnom energijom.

- Gašenjem postojećih blokova bez gradnje jednog modernog i efikasnog bloka, budućim bi generacijama ostavili teret energetske ovisnosti i gašenja velikog broja radnih mjesta – izjavio je Salkić.

OSLOBODENJE

Objavljeno: 15.10.2018.

Liftovi u Stupinama “krali” struju 29 godina

U tuzlanskom naselju radnici Elektrodistribucije su tokom zamjene uređaja otkrili da liftovi od izgradnje objekata nikad nisu spojeni na zajedničko brojilo

Liftovi su zapečaćeni početkom oktobra i od tada su izvan funkcije, iako su neki stanari ponudili da se lift privremeno spoji na njihova brojila

Stanari najmanje tri ulaza u tuzlanskom naselju Stupine ostali su bez liftova, jer je Elektrodistribucija Tuzla prilikom zamjene mjernih satova za zajedničku potrošnju otkrila da su liftovi bili spojeni nelegalno, odnosno da se potrošnja električne energije liftova nije računala niti naplaćivala. Stanarima drugog ulaza zgrade B3 u ovom naselju Elektrodistribucija je dostavila i fakturu na iznos od oko 10.000 KM, koju je potrebno uplatiti ukoliko žele da se lift pusti u funkciju.

Zajednička inspekcija

Stanari ove osmospratnice u Tuzli, u kojoj živi invalid bez noge, te nekoliko starih i teško pokretljivih osoba i porodica sa bebama, ogorčeni su i u potpunosti negiraju da su krali električnu energiju. Kako kažu, najvjerovatnije je da liftovi nisu spojeni na brojilo nikada od 1989. godine, kada je zgrada izgrađena.

- Ovo je Elektrodistribucija otkrila tek kad su skinuli sat. A to je praktično nemoguće uraditi. Druga stvar, apsolutno nije moguće da je neko odlučio ukrasti struju. Ja sam predstavnik vlasnika od 2006. godine i sve vrijeme je, kao i ranije, ormarić pod katancem. Pa, ko bi se upuštao u takvo nešto kad je mjesečni račun za struju koju lift potroši oko 30 KM u ulazu u kojem ima više od 30 stanova? To je marka mjesečno po stanaru, kazao nam je Sead Nurkić, predstavnik etažnih vlasnika u ovom ulazu.

Stanari su u nekoliko navrata pokušali doći do rješenja sa Elektrodistribucijom, ali bezuspješno. Do odgovora u Elektrodistribuciji ni mi nismo uspjeli doći, ali smo nezvanično saznali da je problem zabilježen u nekoliko ulaza ovog naselja, što u ovom trenutku sigurno upućuje i na sistemski propust nakon izgradnje naselja.

Kontaktirali smo i s upraviteljem ulaza, firmom Tehkomerc, iz koje su nam potvrdili da je sve zatečeno “prilikom kontrole koju Elektrodistribucija trenutno provodi”. Napravljena je zajednička inspekcija, a upravitelj je uputio i žalbu prije nekoliko dana, tražeći da se lift pusti u funkciju, te da se problem rješava u hodu.

- Oni su zapečatali cijeli ormarić za zajedničku potrošnju. To praktično znači da mi sad, ukoliko budemo imali neku hitnu intervenciju, ne možemo pristupiti struji u ulazu. Na

katancu je plombirani pečat, koji samo Elektrodistribucija smije otpečatiti. Ono što je nevjerovatno jeste da u Elektrodistribuciji ne znaju kako je do toga došlo i čija je greška, a kažnjavaju se stanari, rekao nam je Nihad Avdić iz Tehkomerca.

Zastarjeli dug

Stanari ne žele platiti 10.000 KM iz nekoliko razloga. Prvo, smatraju da nisu krivi za propust Elektrodistribucije, a drugo zato što smatraju da Elektrodistribucija pokušava naplatiti dug koji je zastario i koji je nemoguće tačno odrediti. Oni su ponudili njima prihvatljivo rješenje.

- Ponudili smo da eventualno platimo posljednju godinu, to je nešto više od 300 KM, mada i zbog toga stanari negoduju, ali želimo da osposobimo lift za komšije kojima je on neophodan za svakodnevno kretanje, naveo je Nurkić.

Činjenica da liftovi do danas nisu proradili sasvim sigurno pokazuje socijalnu neosjetljivost Elektrodistribucije Tuzla i Elektroprivrede BiH, a stanarima nije jasno zašto se lift ne osposobi dok se istovremeno radi na rješavanju problema.

[Miren Aljić](#)

OSLOBODENJE

"EPBiH Hackathon 2018":
Studenti sa četiri
fakulteta pokazali znanja u
razvoju softvera

Objavljeno: 07.decembra 2018

Hackatimovi se takmiče u izradi softverskih rješenja za unaprjeđenje odnosa s kupcima putem mobilne aplikacije i smart home aplikacije

/DAMIR ČUMUROVIĆ

Studenti sa četiri fakulteta iz Kantona Sarajevo učestvuju u dvodnevnom takmičenju EPBiH Hackathon 2018 koji organizuje JP Elektroprivreda BiH d.d. - Sarajevo u saradnji sa kompanijom Microsoft BiH. Riječ je o studentima Elektrotehničkog fakulteta Univerziteta u Sarajevu, Fakulteta za kompjuterske nauke i informacione sisteme, Fakulteta za inženjering i prirodne nauke, te Fakulteta prirodnih i tehničkih nauka. Kako je kazala Midheta Kurspahić, glasnogovornica Elektroprivrede BiH, cilj je potaći mlade ljude da dodatno razvijaju svoje znanje i vještine vezane za programiranje, ali i da rade na razvoju kreativnosti, poslovnih ideja i prezentacijskih vještina.

Hackatimovi se takmiče u izradi softverskih rješenja za unaprjeđenje odnosa s kupcima putem mobilne aplikacije, smart home aplikacije, aplikacije za upravljanje energetsom efikasnošću i edukativne igrice za djecu sa temom "Upoznaj Strujića". EPBiH Hackathon 2018 su osmislili stručnjaci Sektora za informaciono-komunikacijske tehnologije i Sektora za snabdijevanje JP Elektroprivreda BiH i stručnjaci Microsoft BiH.

Omar Krivošija, country manager Microsoft-a rekao je da JP Elektroprivreda BiH i Microsoft BiH ostvaruju dugogodišnju uspješnu poslovnu saradnju.

- Drago nam je da smo u prilici da podržimo Elektroprivredu BiH pri organizaciji jednog inovativnog takmičenja za studente, koji su dobili priliku da se bliže upoznaju sa poslovnim procesima i platformama koje se koriste u Elektroprivredi BiH, iskoriste Azure kao platformu za svoja rješenja, odnosno steknu nova, praktična znanja iz industrije, kazao je Krivošija.

PIŠE: OSLOBODENJE PORTAL